



Hotel Emiran vlasništvo Emira Šarića / AMER KAJMOVIĆ

Zatražen pritvor za pet osoba

Za uhapšene u FBiH traži se pritvor zbog utaje poreza, a u RS-u zbog ometanja pravde

Tužilaštva u Sarajevu i Doboju zatražiće pritvor za pet uhapšenih u akcijama koje je SIPA u četvrtak izvela u Sarajevu, Doboju i Banjoj Luci, potvrđeno nam je iz ovih institucija.

Pritvor za Hasiba Bijelića, vlasnika benzinske pumpe Umax Group, i Emira Šarića, vlasnika studentskog hotela Emiran u Sarajevu, biće zatražen zbog opasnosti od bijega jer imaju rusko državljanstvo.

Za trojicu uhapšenih u akciji Svjedok Okružno tužilaštvo Doboj zatražiće pritvor zbog bojazni od ponavljanja djela, ometanja pravde i uticaja na svjedoke.

Podsjetimo, u akciji Svjedok uhapšen je dobojski advokat Rajko

Stokić, te Banjalučani J. K. i Đ. B, dok je četvrti privedeni nakon ispitivanja vraćen u pritvorsku jedinicu, s obzirom na to da mu je pritvor određen ranijim rješenjem suda u drugom predmetu. Navodno se radi o uticaju na svjedoke na suđenju Peri Blagojeviću, zvanom Pera Lopov, kojeg Stokić zastupa na sudu.

Bijelić i Šarić terete se da su utajili više od tri miliona KM izbjegavajući plaćanje poreza na dohodak od prihoda koje su stekli zastupanjem kompanije Special security wehicle trading iz Dubaija, a novac su uplaćivali na njihove devizne račune, te kupovali nekretnine i automobile. **D. P.**